

Urrengo batzarra Donostia'n, datorren Orrilaren 29'an egitea erabagi da, ta Gerra jaunak Gipuzkoa'ko "Comisión de Monumentos"-eri batzar ori egiteko bere gelea eskatu dagiola ebatsi da.

Azkenez "Junta de Cultura de la Excelentísima Diputación de Vizcaya"-ri Euskaltzaindiaren barrizkuntza onen barri ta bere laguntasun pozgarriagaitik esker biotzekoa emotea erabagi da.

Beste barik oitura-otoitzez amaitu da batzarra.

Euskaltzainburua

R. M. AZKUE

Zadorlaria

NAZARIO OLEAGA

* * *

Donostia'n, 1941'gko, Orrila'ren 29'an, Euskaltzain oneik batu gara: Azkue, maipuru; Urkijo, Gerra, Zamarripa ta Oleaga, euskaltzainak.

Araudizko otoitza egin da.

Azkenengo batzar-agiria irakurri da, ta agobatez onetsi.

Azkue jaunak adierazoten dau, lenago erabagi zanez, Eladio Esparza jaunari jakin erazo dautsola euskaltzaintzarako aukeratua izan dala, ta bere erantzuna, kisa ori beregain pozik artzen dabela, izan dala, bide batez, bere eritiz, bigarren naparro euskaltzaina Angel Irigarai jauna izan daitekela, esanaz. Ganera, Azkue jaunak dino jaun oneri kisa ori eskini dautsola, bafia, bere eskarrak agertuaz, oraingoz ezabela artzen erantzun dabela. Aitzaki barik artu dagiala eskatuz, barriro eskini dakiola erabagi da.

Azkue jaunak, lengo batzarrean asiriko lana irakurten daragoio. Pozik entzun da, ta batzarkideak oartzoren batzuk egin dautsez.

Beste barik eta urrengo batzarra Bilbao'n Bagile'ko 26'an egin dedila ebatsi ta, oiturako otoitzez amaitu da batzar au.

* * *

Bilbao'n 1941'gko. Bagila'ren 26'an, Euskaltzaindia'ren etsean batzen dira Azkue, Urkijo, Irigoyen, Zamarripa ta Oleaga euskaltzain jaunak, Azkue jauna maipuru dala.

Araudizko otoitzaz asten da batzarraldia.

Azkenengoz egindako batzarraren agiria irakurri da ta agobatez onetsi.

Erdera-euskera iztegi barriaren lanen barri emoten da. Onezaz, Azkue jaunak dino, Euskaltzain-urgazle zan Gorostiaga jaunak orri batzuk eroan zituala, ta eskatu dakiozala erabagiten da.

Irigoyen jaunak adierazoten dau Antonio Tovar, "Consejo Superior de Investigaciones Científicas, Instituto Antonio de Nebrija"-ko jaunak, idazki bat bidaldu dautsala euskera ikaskuntzaz asmoren batzuk aitatuturik. Idazki ori irakurri ta, Irigoyen, Urkijo ta Azkue jaunak, Tovar jaunagaz alkartu daitezala ta asmo arezaz zer egin leiken ikusi dagiela erabagiten da.

Azkue jaunak aurreragoko batzarretan irakurten asi zan lanean daragoio.

Eta beste barik araudizko otoitzez amaituten da batzarraldi au.

* * *

Donostia'n 1941'gko Iraila'ren 25'an "Comisión de Monumentos" deritxon baltzuaeren gelan batzen dira Azkue, Urkijo, Inzagaray, Gerra, Zamarripa, Irigoyen ta Oleaga euskaltzain jaunak, lenengoa maipuru dala, il oneri dagokon batzarra egiteko.

Araudizko otoitzaz asten da batzar ori.

Igaroko Bagile'an egindako batzarraren agiria irakurten da eta agobatez onetsia izan da.

Erdera-euskera iztegi barriaren lanak zelan doazan adierazoten dabe lan orretan daragoioen euskaltzainak.

Azkue jaunak diardu lenagoko batzarretan asiriko lana irakurten eta heronetzaz entzuleak oartzoren batzuk dagitsoez.

Eta beste barik araudizko otoitzaz amaituten da batzarra.

* * *

Bilbao'n 1941'gko Urrilaren 30'an, Euskaltzaindiaren etxean batzen dira Azkue, Zamarripa, Irigoyen eta Oleaga Euskaltzain jaunak, il oneri dagokon batzarra egitera, Azkue jauna maipuru dala.

Araudizko otoitzaz emoten yako asiera.

Azkue jaunak adierazoten dau oraintsu il zala Juan Karlos Gerra euskaltzain argi ta agurgarria. Au data-la Euskaltzaindiak beronen tamalik andiena agertzen dau ta ildakoaren gogoaren alde ilotoitz bat egiten dau.

Urrengo, azkenengoz Donostia'n egindako batzarraren agiria irakurten da ta aobatez onetsi da.

Onetan agertzen da batzartokian Euskaltzaintzat izentauta dagoan Angel Irigaray jauna, kisa ori bere gain pozik artzen dabela ta dagokio-
nean ekiteko gertu dagoala esanaz. Batzarkideak atseginez ikusten dabe Irigaray jaunaren etorrerea ta pozik dantzuez bere esanak.

Gero iztegi erdera-euskera gertuten dabilzan euskaltzainak euron lana zelan daroen azaltzen dabe. Onezaz eta lan onetarako laguntza andia izango litzakela-ta, "Junta de Cultura Vasca" deritxon baltzuari, A. Lhande'k gerturiko iztegi euskera-erdera bat nunbaitetik zuzendu ta Euskaltzaindi oneri ekarri dayola eskatutea erabagi da, Irigoyen jaunaren lepora eskari ori egitea utzirik.

Azkue jaunak orainarteko azkenengo batzarretan aitaturiko lana irakurten daragoio, ta heronetzaz batzarkideak oarpen batzuk dagioez.

Azkenez erri-esakera batzuk aiatatu ta aztertzen dira.

Eta beste barik araudizko otoitzaz batzarra amaitzen da.

* * *

Bilbo'n 1941'gko. Lotazila'ren 20'an, Urkijo, Irigoyen eta Oleaga euskaltzainak Azkue jauna maipuru dala, batzen dira Euskaltzaindiaren etxean il oneri dagokon batzarra egiteko.

Araudizko otoitzaz asten da batzarra.

Len-aurreko batzarra'ren agiria irakurri da ta ago-batez onetsi.

Bizkaiko Ekauta edo Diputazioa'ren asmoz aurten euskerea dala-ta irakastaro bat emongo dala dino Irigoyen jaunak eta pozik artzen da barri ori.

Azkue jaunak daragoio lenagoko batzarretan asiriko lana irakurten.

Eta beste barik, urrengo batzarra Donostia'n Ibeltza'ren 30'an egitea ta batzar orrentzat Gipuzkoa'ko Ekauta'ri bere etxeko gela bat eskatutea ebatsi ta, araudizko otoitzaz amaitzen da batzar au.

* * *

Donostia'n 1942'gko. Urtarrila'ren 30'an. Azkue jauna maipuru dala, batzen dira Urkijo, Irigoyen, Irigaray ta Oleaga Euskaltzainak, il oneri dagokon batzarra egitera.